

四庫全書

經部

欽定四庫全書

經部
周易淺述卷三

詳校官國子監祭酒臣覺羅吉善

通政使司副使臣莫瞻菴覆勘

總校官知縣臣繆琪

校對官編修臣盧遂

謄錄監生臣曹方昇

欽定四庫全書

周易淺述卷三

翰林院編修陳夢雷撰



臨卦兌下坤上澤上有地岸臨于水相臨最切又有
進而侵凌之義二陽侵長以逼于陰故曰臨也臨卦
次蠱按序卦有事而後可大故受之以臨臨者大也
可大之業由事而生二陽方長陰小陽大陽氣將盛

是謂可大臨所以次蠱也全象以陽長為亨而以陰
生為戒亦扶陽抑陰之意六爻以二陽徧臨四陰二
當任而初不當任故以二為臨主上四陰皆受陽之
臨者三不中正迫陽而應非正之上故无利四五皆
應陽上附五而厚于二故皆吉也而三曰甘臨四至
臨五知臨上敦臨又有上臨下柔凌剛之義雜卦云
臨觀之義或與或求言彼此相與為臨也

臨元亨利貞至于八月有凶

臨本義謂進而凌逼于物言凡逼近者皆為臨不專居上臨下之意也二陽侵長以逼于陰故為臨而卦中上下彼此又互有相臨之象于一歲中為十二月之卦也下說上順九二剛中上應六五故占者大亨而利于正也又按元亨利貞者乾道之變化陽長之卦獨臨與乾同者易道貴中二陽方主于中乾之體用全脩于此故四德咸歸之也八月有凶戒辭何氏以建子至建未為八月褚氏以建寅至建酉為八月

孔氏據王註小人道長君子道消以建申為八月按
大全不言建申隆山李氏主建酉為觀卦謂當自臨
數不當自復數也本義主建未為遯卦謂文王作卦
時只就周正紀之也今按文王作卦在紂之時未用
周正正朔之說可不必拘以陰陽消長之數論之當
自復數至遯為是蓋否卦陰陽各半觀卦四陰勝陽
其凶不待言矣今曰有凶者亦將盛之辭也于二陽
方盛之時即為二陰方盛之慮聖人防微杜漸之意

也不然則凡陽盛之卦八月皆有陰盛之時何獨于
臨言有凶哉又按復言亨而此言元亨復不言利貞
而此言利貞蓋復初陽未盛至臨則大矣復陽之萌
无有不善臨則陽盛易于肆矣此聖人所以于臨獨
有戒辭也

彖曰臨剛浸而長

此以卦體釋卦名也又辭上下皆有相臨之意此獨
取以陽臨陰浸長內兼二意有漸長不驟之意又有

方來未艾之意

說而順剛中而應

內卦說則陽之進也不逼內不激于意氣矣外卦順則陰之從也不逆外皆中于機宜矣此以卦德言卦之善也九二剛中在我有強毅之才應五柔中在上有知人之主此以卦體言卦之善也

大亨以正天之道也

剛長而說順大亨也剛中應柔中以正也剛長之時

其善如此以之臨人臨事臨天下莫不大亨而必以正者天道宜然也天道扶陽而抑陰黜邪而崇正者也

至于八月有凶消不久也

言二陽方盛之時然至八月為遯則陽之消亦不久矣此雖天運之自然而君子所當戒也

象曰澤上有地臨君子以教思无窮容保民无疆

不曰地下有澤而曰澤上有地主澤之二陽而言也

地臨于澤上臨下也二者皆臨下之事教思无窮澤
潤地之象也容保民无疆地容澤之象也不徒曰教
而曰教思其意念如澤之深不徒曰保而曰容保其
度量如地之廣

初九咸臨貞吉

按王註及程傳皆以咸作感之義本義以咸臨作徧
臨謂以二陽徧臨四陰也從王註程傳為順而徧臨
意可兼蓋咸者无心之感二陽在上无為而天下化

所以為觀二陽在下无心而天下應所以為咸初以
正二以中我中正而天下自應故皆曰咸初二兩爻
與四五正應皆有咸臨之象初以剛居初為得正有
貞吉之象四大臣之位無所感而臨則不獲乎上然
自處不正所應非正亦枉道徇人者矣唯剛而得正
所應又正故曰咸臨貞吉也

象曰咸臨貞吉志行正也

自處以正所應又正則得以行其正道矣時解以此

又作君子臨小人以正陰雖小人然又中未有此象
九二咸臨吉无不利

二應于五上有中正之君既見信任得行其志故有
吉无不利之象此又為臨之主蓋陽在初猶微至此
乃盛初之咸臨謂與二協力以為臨也二之咸臨謂
率初同往以為臨也

象曰咸臨吉无不利未順命也

九二以剛居柔非苟且以取悅于上者有未順命之

象五順體而二說之疑以苟從取悅矣然剛而得中
以此為五所信任非苟將順君命以取容者也本義
于此爻傳云未詳今從此解得聖人教人以道事君
之意然爻中亦實有此象也

六三甘臨无攸利既憂之无咎

卦以陰陽相臨為臨三陰柔說體逼近二陽而與上
非正應坤土味甘變兌為口舌无實心相接但以甘
說臨人之象不中不正下來二陽上无正應有无攸

利之象二陽上逼互卦得震有憂懼之象一變為乾
為泰有无咎之象蓋在上以甘說臨人固无所利然
知憂懼自改則咎可无若小人在上知君子非可以
甘言要結能改過以合乎剛正則咎自可无矣

象曰甘臨位不當也既憂之咎不長也

位不當不中正也始雖有咎而後可无其咎不長也
六四至臨无咎

以陰居陰處得其位與三之不當者異下應初九應

得其正與三之乘陽者異又坤兌之交地澤相比相
臨之切至者也至非至極之謂言誠意以相與也故
无咎

象曰至臨无咎位當也

言位之當而正應之意其中矣

六五知臨大君之宜吉

五變坎為通知之象以柔居中下應九二不自用而
用人知之事也自用其知者其知小不自用而用人

者其知大以此臨下乃大君之所宜吉之道也

象曰大君之宜行中之謂也

中者天理之當然非出于矯飾也

上六敦臨吉无咎

上六居地之上畫又本坤土又變艮土有積累至于極厚之象舊說以上最遠于陽不敢以柔臨剛厚之至也以厚接物未有不安者故厚敦于臨乃吉而无咎之道也然按象傳志在內則非不敢臨之意按蘇

傳六五既已應九二矣上六又從而附益之謂之敦
臨復之六四已應初九矣六五又從而附益之謂之
敦復此說解敦字為切言附五以加厚于二也

象曰敦臨之吉志在內也

上六與九二非正應而志在于九二之陽附五以相
臨厚之至也上以志在陽為吉三以志在上而无利
可知矣卦義以陽臨陰而六爻自三以上陰亦臨陽
陽氣方升陽臨陰在所宜故皆吉陰上陽下雖有以

上臨下之勢而嫌其逼于陽故獨于三爻无利上以遠于陽而志在陽反得吉至四之无咎五之吉則又皆應于陽者陽氣方盛勢正上進吉多凶少聖人言外扶陽抑陰之意又可見矣



觀卦下坤上巽風行地上徧觸乎物有自上觀下之義則為去聲之觀二陽在上四陰所仰有自下觀上之義則為平聲之觀全象取以上示下之義故卦名

取去聲之觀也觀卦次臨按序卦物大然後可觀故
受之以觀觀所以次臨也彖取上觀下之義在上者
致其潔清不輕自用民自信而仰之此全彖之大旨
也六爻以四陰自下仰觀二陽然上不得位故以五
為觀之主而下四陰則近者吉而遠者凶四觀光而
三進退二利女而初則吝矣蓋臨卦二陽在下進而
凌陰故陰欲遠陽觀卦二陽在上陰自下仰故陰欲
近陽此又扶陽抑陰之微意也

觀盥而不薦有孚顒若

觀者以中正示人爲人所仰也盥者將祭而潔手薦奉酒食以祭也顒若尊敬之貌盥者无不薦盥時誠意精專薦亦未至于懈今云盥而不薦者風行地上萬物肅清然无形可見有盥而不薦之象然氣之所至自然鼓動萬物有孚而顒若之象聖人潔清自治恭己无爲不待政教號令之行而羣下信而仰之莫不整肅猶祭者方盥手於洗誠意精專不待牲牢酒食

之陳而精誠使人皆肅然生敬也又按大壯則取四陽之盛觀則不言四陰之盛反取二陽在上為四陰所仰則又聖人扶陽抑陰之意也

彖曰大觀在上順而巽中正以觀天下

陽為大故曰大觀在上以位言順巽中正以德言中正指九五也有位无德有德无位皆不足以觀天下順則心于理无所乖巽則事于理无所拂具順巽之德以我之中正觀天下之不中正者此節以卦體卦

德釋卦名義也

觀盥而不薦有孚顒若下觀而化也

非有意于感人而觀者自化也此釋卦辭也

觀天之神道而四時不忒聖人以神道設教而天下服
矣

神者无形與聲而妙不可測天運自然四時不忒天
之所以為觀神道也聖人亦不俟號令政教之煩使
天下自服聖人之所以為觀以天之神道設教也不

薦之乎聖人之神道也猶中庸之篤恭而天下平上天之載无聲无臭也此因卦辭而極言之

象曰風行地上觀先王以省方觀民設教

風行地上徧觸萬物有周觀之象先王體之省方以觀民風而設教如國奢示儉國儉示禮之類是也坤為土有土有民省方觀民坤之象巽以申命設教巽之象

初六童觀小人无咎君子吝

卦以觀示為義據九五為主也又以觀瞻為義皆觀乎九五也初六陽位而陰爻陽則易而陰則稚又居卦之下如未有知識之童子不能遠見有童觀之象小人无咎而君子則吝者蓋下民日用而不知乃其常也君子不著不察則可羞矣

象曰初六童觀小人道也

小人之常也

六二闕觀利女貞

六二質柔位陰女子之象自內窺外雖與五為應而為三四所隔三四五互為艮有自門內闕視所見者小不見其全之象此女子之正道也

象曰闕觀女貞亦可醜也

在丈夫則可醜矣

六三觀我生進退

諸爻皆觀乎五故三上不取相應之義我生我之所行也六三隔四不能觀國居下之上可進可退故不

觀九五而觀已之所行可否何如以為進退量已而後入官者也他卦居中多吉三不中多凶此獨以觀之遠近取義故四最善而三次之

象曰觀我生進退未失道也

進退合宜未失其常道也

六四觀國之光利用賓于王

六四下互坤土有國象互五為艮近陽爻有光明象五為君王象四承五最近而柔順得正賓于王之象

其占利于朝覲仕進也

象曰觀國之光尚賓也

士不苟進君以賓禮待臣有非常之遇矣故其志尚樂于進用也

九五觀我生君子无咎

九五陽剛中正以居尊位下四陰仰而觀之君子之道也然必返而自觀我之所行果合于君子乃得无咎蓋觀本四陰侵陽之卦故有危詞苟我之所行不

足以觀示四方反有咎矣

象曰觀我生觀民也

人君有臨民之責而曰觀我生非置民而不問也王者通天下為一身觀我所行之善否即可以知民之善否矣觀我正所以觀民也本義又當觀民德之善否似作言外補意稍緩

上九觀其生君子无咎

上九以陽剛居尊位之上亦為下所觀瞻若賓師之

位也故亦當反觀己之所行求免于咎也曰其生者上无位不當事任避九五不得稱我也

象曰觀其生志未平也

自省其身未得自安故曰未平不敢以不居其位而晏然不自省也觀為陰盛之卦而九五陽剛得位故有可以觀示下民之象然高位為衆所仰非可易居而陰盛亦多戒懼故五僅无咎而上志未平也四陰觀在上之陽位高則所觀者大卑下則所觀者狹此四

觀光三進退而初二則羞吝也



噬嗑下震上離噬齧也嗑合也口中有物間之必齧而後合卦上下兩陽而中虛頤口之象九四一陽間于其中必齧之而後合故為噬嗑噬嗑次觀按序卦可觀而後有所合故受之以噬嗑嗑者合也既有可觀然後有來合者噬嗑所以次觀也口有物間之必噬而後合天下有強梗讒邪間之亦必治之以法而

後治成又火為明雷為震皆有當于治獄之道故全卦皆以治獄之事言之六爻則初上无位為受刑之人中四爻為用刑之官大抵以爻位之剛柔論噬之難易要歸于能謹此全卦六爻之大略也

噬嗑亨利用獄

上下兩陽而中虛口之象天下之物中有所間則不通齧之而合則通矣故有亨象此概論天下之事利用獄則噬嗑中之一事也天地生物有為造物之梗者

必用雷電擊搏之聖人治天下有為民之梗者必用
刑獄懲治之上離電之明所以察獄也下震雷之威所
以決獄也六五以柔居中有威與明而得中者也故有
利用獄之象又相噬以求合教化之衰也故但利用獄
象曰頤中有物曰噬嗑

上下兩陽頤象中一陽有物象此以卦體釋卦名義
所謂近取諸身者也

噬嗑而亨剛柔分動而明雷電合而章柔得中而上行

雖不當位利用獄也

噬之而噬乃得亨通以治道論寇盜作梗以倫紀論
讒邪作梗治而去之則合矣彖傳增而字所謂以卦
名釋卦辭也三陰三陽剛柔均分此以卦體釋卦辭
也下動而上明言未噬以前以噬而致亨雷震電耀
相須並見曰合而章言既噬之後以噬而致亨所謂
以卦德二象釋卦辭也此以上皆釋噬嗑之亨也柔
得中句本義謂卦變自益卦六四上行于五而得其

中然與得中上行不合今依卦綜賁之離二本得中
今上行于五為是以柔居五為不當位然剛柔相濟
治獄所宜此以卦綜釋卦辭也此二語釋利用獄也
象曰雷電噬嗑先王以明罰勅法

雷電當作電雷明者辨別精審之意象雷之明所以
示民而使之知避也勅者整飭嚴整之意象雷之威
所以防民而使之知畏也罰者一時所用之法法者
平日所定之罰明罰勅法猶不知戒不得已乃有豐

之折獄致刑

初九屨校滅趾无咎

初上受刑之象中四爻用刑之象校足械也屨校者校其足如納屨然趾所以行滅其趾遮沒其趾使不得行受刑之小者也震為足初應四三四五互為坎為桎梏初爻最下故有屨校之象震變坤不見其足滅趾之象罪小而受薄刑小懲可以大誡故无咎也象曰屨校滅趾不行也

震主動變坤則靜不敢妄動不進于惡矣

六二噬膚滅鼻无咎

中四爻言用刑之人皆取食物為象膚豕腹下柔軟无骨之肉噬而易噬者滅鼻深入至沒其鼻也六二陰柔中正聽斷得理噬之最易合者二三四互艮為鼻二變則為離故有深沒其鼻之象蓋以乘初之剛以柔治剛深痛治之不至于有咎也此鮮照程傳按本義謂傷滅其鼻占者雖傷而終无咎然噬膚无傷

鼻之理不如程傳之順

象曰噬膚滅鼻乘剛也

噬膚至于滅鼻疑于深矣所以无咎者以乘剛故也
盖在下有强梗之人恐過柔以治之則廢故深嚴而
得宜乃得其中也

六三噬腊肉遇毒小吝无咎

腊肉小獸全體骨而乾之者堅韌之物也六三柔中
有剛有腊肉象互坎有遇毒象六三陰柔不中正治

久年疑獄而人不服者也故占小吝然時當噬嗑于義亦无咎也

象曰遇毒位不當也

以柔弱居剛強之位故也

九四噬乾肺得金矢利艱貞吉

乾肺肉之帶骨者至堅而難噬者也金矢本義謂入鈞金束矢而後聽之然周禮束矢鈞金所以禁民訟獄使瑣屑之事不敢妄興訟非聽訟之正道也不如程

傳以金剛矢直為得治獄之宜九四離體離為乾乾
肺之象三四五互坎坎得乾之中爻有金象坎又為
矢得金矢之象九四以剛居柔居大臣之位所斷之
獄又非若膚腊之易者必如金之剛則不撓如矢之
直則无私然剛直非易行恐瞻顧而不果矣故必艱
難正固則吉

象曰利艱貞吉未光也

離有光明之象四離體而居下大臣之位不便威福

自己治此大獄雖以剛直為主未免艱難戒懼故曰
未光

六五噬乾肉得黃金貞厲无咎

乾肉難于膚而易于腊肺者也六五君位小事不至
于君故所噬非膚之易君威無所不加故不至如腊
肺之難黃金本義謂指鈞金盖周禮小事束矢大事
鈞金大臣大小兼聽唯鈞金則以聞之君者也今從
程傳作剛中之德為優離中變乾為金黃金之象盖

大臣貴其不撓尤貴于无私君則无可私矣唯恐其
優柔不斷而已黃中色而金剛德六五柔順居尊剛
柔相濟得其中矣然刑者聖人不得已而用之不可
无戒懼之心也故雖貞亦厲但于義則无咎也五位
與二同而五能噬乾肉二但能噬膚者二以柔居柔
而五以柔居剛五之才勝乎二也五之才與三同而
五得黃金三不免遇毒者三之柔不中五之柔得中
五之位勝乎三之位也六五之才之位勝二三而爻

辭但言无咎不及九四之吉者五之柔不如四之剛也蓋九四以剛噬者有司執法之公六五以柔噬者人君不忍之仁然治獄本有司之事而有司雖威照並行必以剛直為主故論治獄之道必以九四為則也

象曰貞厲无咎得當也

得當謂處剛而得中也彖言不當位以位言也爻言得當以事言也四爻言吉而傳曰未光五爻僅无咎

而傳言得當者九四臣位必艱貞而後吉權難自主所以未光五君位用刑人无不服而以艱貞危厲為心蓋欽恤之道當然故在五為得其當也

上九何校滅耳凶

何負也本文離為稿木三四互坎為耳為桎梏坎耳在下有何校而滅其耳之象居卦之極怙終不悛罪之大者故凶

象曰何校滅耳聰不明也

罪其聽之不聰怙終而陷于大罪也九未變為離之
明今變不成離故不明也全卦以物由噬而得合莫
甚于用獄以懲奸故所論皆用獄之事初上无位為
受刑之人初過小而在下為治獄之始上惡極而怙
終為用刑之終中四爻皆治獄之人然卦才之剛柔
不同故所噬之難易亦異六二以柔居柔故噬膚最
易者也六五以柔居剛為得中者故噬乾肉然比膚
則難矣六三柔中有剛則噬腊肉比乾肉難矣九四

剛中有柔則噬乾肺噬之最難者也難易雖有不同而四艱貞三亦遇毒五貞厲而三亦滅鼻則治獄之道期于敬謹一也



賁卦下離上艮山下有火山者草木百物所聚火照之其上百物皆被光彩有賁飾之象又卦綜剛柔交錯卦德文明以止皆有賁飾之義故為賁賁次噬嗑按序卦嗑者合也物不可以苟合而已故受之以賁

人物合聚必有次序行列威儀上下而文飾生焉賁所以次噬嗑也賁雖尚文必以質為本凡事无本不立无文不行故全彖以賁有可亨之道然本大而文小故不過小利于所往六爻初四以相應為賁而二與三五與上則以相比為賁三爻在內者離體則以文明為賁故賁趾賁須濡如皆有所設飾三爻在外者艮體則又以篤實為賁故皤如丘園白賁皆取于質素然內三爻雖以文明為賁二之賁須既出于自

然初之舍車則取其高隱三之濡如即戒其永貞于
賁飾之時皆以不賁為賁此又聖人返樸還淳之妙
用維持世道之深意此六爻之大略也

賁亨小利有攸往

賁飾也凡事无文不行有賁之文文以輔質此賁所
以亨然文勝又恐滅質内文明而艮止于外収歛其
文不欲盡發故小利有攸往盖凡事以本為大而文
則小也又按小利有攸往固所利者小之意亦有唯

小則利之意蓋陰小陽大小利往而大不宜往矣故
以下六爻陰爻皆宜動而陽爻多有戒辭此又賁而
剝之漸也

彖曰賁亨

亨字疑衍

柔來而文剛故亨分剛上而文柔故小利有攸往天文
也

柔來二句以卦綜言蓋噬嗑以初五兩爻為主爻此

二上兩爻為主爻噬嗑五柔來為賁二居初三兩剛之中所謂黃離元吉得中道者也文在其中是以謂之賁亨噬嗑初上而為賁上居四五兩爻之終所謂敦艮之吉以厚終者也文成其終是以小利有攸往柔來不言分離反為離中偶不動也剛上言分者震反為艮下畫移居上畫也天文也上有剛柔交錯四宇日月五星之運行不過剛柔一往一來而已故曰天文

文明以止人文也

此以卦德言之君臣父子夫婦兄弟朋友之間燦然有禮以相接文之明也截然有分以相守文之止也觀乎天文以察時變觀乎人文以化成天下

聖人觀日月之次昏旦之星以察四時寒暑之變觀于君臣父子之間有禮有分而導之以禮樂詩書列之以采章服物化舊為新而風俗成于天下占此卦者雖小利于所往而賁之為用又大如此

象曰山下有火賁君子以明庶政无敢折獄

山下有火明不及遠明庶政事之小者離明在內之
象折獄事之大者艮止于外之象又山在上法有所
必守火居下明有所不矜君子體此于錢穀簿書之
小必精審之以成文明之治至折獄則无敢无敢非
不折也盖獄貴詳審得情若自恃明察深文緣飾沒
其情實是之謂敢敢則民命不可問矣

初九賁其趾舍車而徒

初在下為趾象二三四互為坎為車象初雖與四應而在最下艮止于上故以剛德明體自賁于下為舍非道之車而安于徒步之象蓋君子以義為榮不以徒行為辱故也初四相應四求初為貴德初求四則為趨勢故以徒行為賁壯初剛居剛而健體故壯于趾賁初剛居剛而明體故賁其趾車馬幣帛主于文飾故賁六爻取象及之

象曰舍車而徒義弗乘也

君子之取舍決于義每于在下之時發足之初觀之
徒義而車非義故弗乘非惡富貴而逃之也

六二賁其須

須鬚同在頤曰須在口曰髭在頰曰髥三在上有頤
體上在頤下須之象須亦人身之有文飾者故以須
言之二以陰柔居中正三以陽剛而得正皆无應與
然須附頤以成其文二爻相比以為賁者故二附三
而動有賁須之象蓋須生而美非外飾者六二柔麗

乎中正固有其美須之賁非待于外也然陰柔不能
自動必附麗于陽如須雖美必附于頤占者宜資人
共濟從上之陽剛而動則可有為也

象曰賁其須與上興也

不能自興隨上而動也

九三賁如濡如永貞吉

三五坎一陽居二陰之間得其賁而潤澤者也故有
濡如之象然坎體有濡象亦有陷溺之象九三非不

貞也能永其貞而不溺于所安則二陰于我有潤澤之濡而我无陷溺之悔矣故吉此爻與二以相比為賁然小利往故二隨上而三則宜永貞也

象曰永貞之吉終莫之陵也

陵生于狎以正自持顰笑不假誰能陵之

六四賁如皤如白馬翰如匪寇婚媾

皤髮之白者四變互二三為巽為白不變互為坎為馬四與初以相應為賁乃為三所隔心雖合而迹睽

不得所賁為疇如之象然本正應不肯他從往求之心如飛翰之疾有白馬翰如之象九三剛正非為冠者也乃求婚媾耳此與屯六二相似屯剛柔始交賁剛柔相襍皆有婚媾象然屯之乘馬班如意甚緩賁白馬翰如意獨急者屯二以下求上難進易退賁四以上求下虛已求助也此又與初以相應為賁然小利往故初賁趾而四則翰如也

象曰六四當位疑也匪寇婚媾終无尤也

四與初遠為三所隔所當之位有可疑也然位雖近
三心實在初守正不與理直義勝三不得而尤之也
六五賁于丘園束帛戔戔吝終吉

六五柔中為賁之主離之文明至艮而有所止漸近
敦本而尚實上九艮體有丘象五互三四震未有園
象五比上以成賁者人君虛已以求山林隱逸之賢
故有不賁于朝市而賁于丘園之象陰性吝嗇淺小
薄物可以自將故有束帛戔戔之象如此雖可羞吝

然禮奢寧儉禮賢貴質實不事虛文故得終吉蓋賁以文飾成卦過則流于靡矣自五與上皆有敦本返始之象

象曰六五之吉有喜也

方逐末之時人君崇儉反本人心世道之幸也

上九白賁无咎

居賁之極反本復于无色有白賁之象如此則善補過矣故占為无咎此爻與五相比以成賁五君以東

帛相加上則遂其高隱之志唯以朴質為本唯小利
往故五可賁于丘園而上但宜守其白賁也

象曰白賁无咎上得志也

居卦之上在事之外不假文飾而有自然之文可謂
優游自得矣以人事言則六五以束帛聘而上高尚
自守以成其志亦得志也全卦以賁飾為義華美外
飾世趨所必至也然无所止則奢而至于偽故文明
而有所止乃可以為賁也內卦文明漸盛故由趾而

須至于濡如則極矣故戒以貞文明而知永貞則返本之漸也故四之皤如猶求相應以成賁也五之丘園則返朴上之白賁則无色矣由文返質所謂有所止也六爻以三陰三陽剛柔交錯而為賁如錦繡藻繪間雜成章凡物有以相應而成賁者則初四是也有相比而成賁者則二三是有相比而漸歸淡樸以為賁者則五上是也盖文質相須者天地自然之數賁之所以成卦而質為本文為末質為主文為輔

務使返朴還淳則聖人所以繫之辭而維持世道之心也至于初應四而四翰如二比三而二與上與五比上而五賁丘園三陰爻多利于往此又陰盛之漸所以賁之後為剝也



剝卦下坤上艮山高于地而附着于地有傾頽之象又卦五陰自下漸長消剝一陽故為剝剝卦次賁按序卦賁者飾也致飾然後亨則盡矣故受之以剝文

飾之極反而剥落剥所以次賁也全象取順時而止之義故君子不可有所往六爻以上九為主故于上爻幸一陽之存而下五爻凡有與于陽者吉无與于陽者凶五以承陽故无不利三以應陽故无咎初二遠陽而剥未盡故皆蔑貞凶獨六四以迫于陽而剥極故直言凶也此全卦六爻之大略也

剥不利有攸往

剥落也五陰盛而一陽將消九月之卦陰盛陽衰小

人壯而君子病又內坤順而外艮止有順時而止之象故占者不利于有所往也

彖曰剝剝也柔變剛也

自姤而遯而否而觀而剝皆以柔而變其剛至此則欲以五陰變上之一陽也此以卦體釋卦之名義也不利有攸往小人長也順而止之觀象也君子尚消息盈虛天行也

五陰剝陽小人之長也此以卦體言也卦有順而止

之象君子觀之陽消陰息陰盈陽虛天運之行如是
君子尚之順時而止所以合乎天之行也知天行之
方剝則不至不量力以取禍知剝之必有復亦不至
怨天尤人而變其所守矣

象曰山附于地剝上以厚下安宅

山附于地下基不厚則上不安高者有剝落之象為
君子者以此制田里教樹畜以厚下民即以自安其
居也卦以下剝上取義小人剝君子所以成剝也象

以上厚下取義人君厚下民所以治剝也不以陰陽消長為論而以上下厚薄為言于極危之卦得極安之道此聖人用卦之微權也

初六剝牀以足蔑貞凶

蔑滅也牀者人之所安其體上實下虛剝一陽下五陰有牀象坤土艮山本至安剝則危矣故卦有剝牀象初在下有足象剝自下起侵蔑正道其占凶也方剝足而即言蔑貞如履霜而知堅冰至也

象曰剝牀以足以滅下也

侵滅正道自下而上也

六二剝牀以辨蔑貞凶

辨牀幹也牀身與足上下分辨之處也二陰侵上占

與初同

象曰剝牀以辨未有與也

二陰徒與未大盛危之中有幸之之意

六三剝之无咎

衆陰方剥陽而三獨與上應去邪黨而從正者也咎
可无矣剥之三同復之四復四與初應而不許以吉
剥三與上應而許以无咎何也復君子之事不言其
吉明道不計功者也剥小人之事許以无咎欲人遷
善改過也剥以近陽者為善應陽者次之故五利而
此无咎

象曰剥之无咎失上下也

上下四陰也居四陰之中而獨與陽所失者陰其失

也乃所以為得也

六四剥牀以膚凶

四在下卦之上猶人卧處有剥牀及肌膚之象故不

復言蔑貞而直凶也

象曰剥牀以膚切近災也

陰禍已迫其身也

六五貫魚以宮人寵无不利

魚陰物宮人陰之美望寵于陽者也五變巽有魚象

巽為繩貫之之象以者后妃以之也六五柔中居尊率羣陰以從陽故有后妃之象卦德內順外止猶后妃以宮人脩數循序以進御于君后德之美者也故占无不利蓋剥至于五極矣陰不可以再長陽不可以終消也故不取剥義自初至四以陰剥陽此則循序而以陰從陽聖人示之戒若曰與其以次剥陽而至凶孰若以次從陽之无不利乎故彖言不利有攸往為君子謀也此言无不利為小人勉也此聖人欲人

悔過之心也然六三應上九而寧失羣陰之心六五率羣陰而上求一陽之寵則天道之不可一日无陽世道之不可一日无君子也又按遯剥皆陰長之卦遯陰微可制故授權于陽于九三曰畜臣妾吉陽制陰之道也剥陰盛難制矣故示教于陰于六五曰以宮人寵陰從陽之道也陰陽消長出于自然爻中自有此象而扶陽抑陰不可无人事之功此聖人繫辭之深心也

象曰以宮人寵終无尤也

衆陰逼陽疑有尤也循序以從尤終可无也

上九碩果不食君子得輿小人剥廬

艮為果蓏一陽獨存于上如碩大之果不為人所食
獨留木末之象果不食必爛核墮地又復生仁窮上
反下陽將復生也坤為輿五陰載上九之一陽有君
子得輿之象上九變柔有小人象一陽覆五陰有廬
象變偶則破敗矣有剥廬象一陽未盡猶可復生君

子得此則為小人所載小人居之則剥極于上自失
所覆如剥其廬蓋君子能存陽德能覆小人小人陰
屬勢必欲害君子然自古未有君子亡而小人能自
容其身者廬剥則小人亦无所容矣象如是而占因
君子小人而分也

象曰君子得輿民所載也小人剥廬終不可用也

民指衆陰剥極思治陽剛君子民所共載小人至此
欲剝盡諸陽不知其終不可用也全卦當陰盛陽衰

之時故君子不利于所往然能以陰承陽者无所不利而應陽者亦得无咎唯遠陽而剝陽者凶雖聖人之戒辭亦陰陽消長之定理也



復卦下震上坤一陽生于五陰之下陰極而陽復君子之道消而復長有返于善之義故為復復卦次剝按序卦物不可以終盡剝窮上反下故受之以復陽剝極于上復生于下復所以次剝也全象以陽剛來

反理勢必亨又震動坤順所往皆利天地以生物為
心天地之一陽初動猶人善念之萌聖人所最重此
全象之大旨也六爻以初爻為主故凡有得于初陽
者吉无則否二比初曰下仁四應初曰從道此皆得
于陽者也餘三陰皆无得于陽者獨五以得中而无
悔三不中則頻失頻復而厲上則去初最遠居卦之
窮迷而不復宜其凶也此六爻之大略也

復亨出入无疾朋來无咎反復其道七日來復利有攸

往

復陽復生于下也剥盡則為純坤十月之卦陽氣漸生
至十一月一陽之體始成其卦為復陽往而復反有
亨象內震外坤陽動于下順而上行反下為入上行
為出皆以順行有出入无疾之象先出後入于語順
也諸陽自此可享有朋類之來皆得无咎之象又自
五月姤卦一陰始生至此七月而一陽來復乃天運
自然反復之道此時剛德既長君子可以有為故于

占利有攸往也不言月而言日猶詩言一之日二之日也臨卦于陰之長則曰八月欲陰長之緩也此于陽之長則曰七日欲陽復之速也又七為陽數日為陽物故于陽長之卦言之八為陰數月為陰物故于陰長之卦言之

彖曰復亨剛反

剛德復反有可亨也

動而以順行是以出入无疾朋來无咎

剥以順而止復以順而行道消之極道長之初未有不順而能免咎者出入朋來陽之動无疾无咎以順行故也

反復其道七日來復天行也

陰陽消長天運之自然也

利有攸往剛長也

既生則漸長故利于往自內出為往動而順行以下以卦德言反復其道以下以卦體言

復其見天地之心乎

天地以生物為心積陰之下天地生物之心幾息一
陽來復而天地之心可見在人則惡極而善念萌動
之時也先儒以靜為天地之心程傳以動為天地之
心然陰陽分動靜善惡不可太拘蓋天地之氣純陰
寂靜之中未嘗无陽然必一陽之動而後生物之心
可見在人則所動之念有善有惡必其善端之動乃
可謂見天地之心也

象曰雷在地中復先王以至日閉關商旅不行后不省方

閉關休息安靜以養微陽也在人心則善端之萌甚微亦必莊敬以養之不然復亡之矣卦辭言出入无疾而象言閉關息事盖動者天地生物之心而靜者聖人裁成之道也

初九不遠復无祇悔元吉

一陽復生于下復之主也祇至也居事之初失之未

遠復于善而不至于悔大善而吉之道也人有過失或至于微色發聲困心衡慮此則有不善未嘗不知知之未嘗復行也

象曰不遠之復以修身也

修身之道无他知不善而速改而已

六二休復吉

柔順中正近于初九之仁人能比而下之取友以輔仁者復之休美吉之道也

象曰休復之吉以下仁也

克己復禮為仁初剛德之復仁者也二能親而下之故吉

六三頻復厲无咎

不中不正處動之極復而不固有頻失而頻復之象
頻失則厲復則无咎蓋三爻在上下進退之間巽以
柔為主巽九三剛而不中以此柔故頻巽而吝復以
剛為主復三柔而不中以此柔而位剛故頻復雖厲

而无咎

象曰頻復之厲義无咎也

得補過之義

六四中行獨復

四在上下四陰之中有中行之象不比羣陰而與初
應有與衆俱行獨能從善之象此時陽氣甚微未足
有為故不言吉然理所當然吉凶非所論所謂明其
道不計其功者也

象曰中行獨復以從道也

以其從陽剛君子之善道也修身以道修道以仁仁與道皆所以修身也

六五敦復无悔

坤土有敦厚之象四以應初而復五雖與初無應然以柔中居尊因四之獨復而能篤其行厚其養以復于善者猶臨之有敦臨也故可无悔按來註謂不遠復者善心之萌敦復者善行之固無祇悔者入德之

事无悔者成德之事是以五胜于初也然初曰无吉
五僅曰无悔不得以五勝初竊意此乃困知勉行所
謂人一己百人十已千百倍其功者能如是悔亦可
无也

象曰敦復无悔中以自考也

五居中中即天地之心考成也以中道自成也二四
待初而復學知利行者也故曰下仁曰從道五與初
非比非應而復困知勉行者也故曰自考自即人一

已百之意蓋五本遠于陽但以居中能順因四自返加厚其功故能自成也

上六迷復凶有災眚用行師終有大敗以其國君凶至于十年不克征

上六以陰柔居復終位高而无下仁之美剛遠而失遷善之機厚極而有難開之蔽質柔而无改過之勇无應而无從道之明是終昏冥而不復者也災自外來青自己作坤先迷今居其極有迷復象坤為土為

衆有行師象在上近五有以其國君象地數十有十年不克征之象

象曰迷復之凶反君道也

陽剛在上君之道此剥之上九所以為民所載也復上反之故以其國君凶也全象以氣數言復有必亨之理故出入可以无疾朋來亦得无咎所以然者以七日來數反復之道天運之自然也六爻以人事言剛德為善端之復質柔以從剛為貴人事之當然也

故五之自考不如四之從道四之從道不如二之下
仁二之下仁不如初之修身三頻復雖危猶知復也
上迷復反道則災眚所必至矣聖人示人以復善改
過取友修身之功莫切於此



无妄下震上乾无妄者實理自然之謂震動也動以
天為无妄動以人則妄矣无妄次復按序卦復則不
妄矣故受之以无妄復者反于道也既復于道合于

正理而无妄矣无妄所以次復也全象大亨而利于
正不正則所往不利盖正則合于无妄不正則妄矣
六爻下三爻震體時當動而動者故動則應天初之
往吉二之利往三曰行人之得皆動而无妄者也上
三爻乾體時當靜而靜者故動則拂天四之可貞五
之勿藥上之有眚皆以不動為无妄者也乾體非靜
但震動之時已過則宜順乎天不必復有所動耳此
六爻之大略也

无妄元亨利貞其匪正有眚不利有攸往

无妄實理自然之謂史記作无所期望而得亦即自然之意盖有所期望皆妄也天之化育萬物生生不窮各正其性命本无妄也下震上乾動與天合自可大亨而必利于正固若有不正即妄也則有過眚而所往不利矣吉凶悔吝生乎動卦以震動為主故聖人多戒辭

彖曰无妄剛自外來而為主于內動而健剛中而應大

亨以正天之命也其匪正有眚不利有攸往无妄之往何之矣天命不祐行矣哉

剛自外來而為主于內以卦綜言也大畜艮在外為主今反為震為主于內此卦之所以為无妄也動健以下一正一反能如本卦之德動健剛中而應則以正合乎天命矣若其不以正則私意妄動必不可行也震動乾健以卦德言九五剛中而應六二以卦體言天之命天理之當然也无妄之往何之承上匪正

言无妄而不正往復何所之乎不正則逆天之命天必不祐其猶可行乎哉

象曰天下雷行物與无妄先王以茂對時育萬物

天下雷行震動發生萬物各正其性命物物與之以无妄也先王法此對其所育之時養育人民使昆虫草木无不得宜亦物物與之以无妄也對時如孟春犧牲毋用牝斧斤以時入山林之類茂者盛大之意无時不對无時不育也即盡人性盡物性贊化育之

謂也天下雷行物物與以无妄物物各具一性物物一自然之天也聖人因物之性以育萬物使物物各得其天聖人一自然之天也

初九无妄往吉

初當位而動為无妄之主動之得正者也何往非吉按他卦皆以應為吉此則二應五三應上乃三有災五有疾而上不免于眚獨初以无應而吉者蓋卦名无妄貴于无心有心于應而往則妄矣震陽初動誠

一未分剛實无私動與天合不必有應而得无心之吉也

象曰无妄之往得志也

誠能動物往无不通也

六二不耕穫不菑畬則利有攸往

耕農之始穫其成也田一歲曰菑三歲曰畬始耕終穫先種後畬此自然之常今皆曰不統付之无心也或作不耕而自穫不菑而自畬或作不以耕而計穫

不以畱而計畬唯奉義謂四者俱无不耕不畱无所
為于前不穫不畬无所冀于後也盖无妄之時有所
為所得付于兩忘而自然如此者互卦上巽下震耕
耨之象震為禾稼收穫畱畬之象六二柔順中正因
時順理而无私意期望之心故有不耕穫不畱畬之
象占者如是則利于有所往矣盖假象之辭不可以
辭害意也

象曰不耕穫未富也

未富如非富天下之意言非計其利而為之也

六三无妄之災或繫之牛行人之得邑人之災

三變離牛象互巽為繩艮為鼻繫牛之象震為大塗
中爻人位行人之象卦之无妄皆以正而亨六三則
不中不正矣故有无妄致災之象行人牽牛以去居
者反遭詰捕之擾所謂无妄之災也震主動故去者
猶可倖免居者反以无妄致災占者得此則以其行
止分其吉凶也

象曰行人得牛邑人災也

得者有无妄之福邑人有无妄之災

九四可貞无咎

九居四非貞也然陽剛乾體不事應與可以自守其正
不可以有為亦不至于有咎也盖下卦震體以動為
无妄四交乾則動之時已過以不動為无妄可貞則
不雜以妄矣

象曰可貞无咎固有之也

有猶守也天命之正人所固有貞者守其所固有也
九五无妄之疾勿藥有喜

五變互三四為坎有疾之象互巽木艮石藥之象乾
剛中正以居尊位當无妄之時容有非常意外之事
靜以待之則自消如有疾勿藥而自愈也

象曰无妄之藥不可試也

无妄而試藥反為妄矣故不可

上九无妄行有眚无攸利

上居乾之終純乎天矣无妄之至也然卦當窮極以九居上其位不正行則无利即象所謂匪正有眚不利有攸往也

象曰无妄之行窮之災也

无妄宜可行然時位窮極而行則自為妄以取災也全象无妄二字之義兼本義實理自然與史記无所期望二意无妄而出于正則利不正則有眚天下有无妄之福无妄之禍而自處不可不出于正也六爻

內三爻以動為正故初往吉二往利三之行人亦得
牛皆有无妄之福也外三爻以不動為正故四可貞
五勿藥上行則有眚蓋雖有无妄之禍而能靜守其
正則眚亦可无也无妄之禍福聽于天唯正則不失
可亨之道聖人示人切矣



大畜下乾上艮天在山中所畜者大則有畜聚之義
乾健上進為艮所止則有畜止之義以陰畜陽所畜

者小則為小畜以陽畜陽畜之力大則為大畜大畜次无妄按序卦无妄然後可畜故受之以大畜物有其實乃可畜聚大畜所以次无妄也全象兼畜德畜賢畜健之意總以見畜之大六爻上三爻良為畜者下三爻乾受畜者初受四之畜故初有厲而四言牝牛也二與五應受五之畜故二言說輶而五續豕也至三與上則合志上行又畜極而通矣此六爻之大略也

大畜利貞不家食吉利涉大川

大陽也以艮畜乾畜之大者內乾剛健外艮篤實輝
光能日新其德所畜者大矣異端曲學所畜多而不
正者有矣故利于貞所畜既正可以享天祿而有為
于天下在一身為畜德為國為畜賢故賢人有是德
則其占不畜于家而畜于朝一身之吉亦天下之吉
也互兌為口在乾之上食天祿之象所畜既大能應
乎天可以濟險又互體震木在兌澤之象如舟之行

乾健應之故又有利涉大川之象蓋畜極而通也

彖曰大畜剛健篤實輝光日新其德

此以卦德釋卦名義也在他卦艮但言止此言篤實
輝光者艮止故能篤實此艮一陽之所以能畜也篤
實自有輝光蓋畜于中而見于外也以乾體之剛健
无人欲之私艮之篤實无虛偽之飾則闇然日章自
有輝光畜之不已其德必日新矣彖畜字有三義以
蘊蓄言之蓄德也以畜養言之畜賢也以畜止言之

畜健也此專言蘊蓄之義下文乃以畜賢畜健言之
剛上而尚賢能止健大正也

以卦綜言之无妄下卦之震上為大畜之艮剛上也
以卦體言六五居中尊尚上九所謂尚賢也以卦德
言以艮之止止乾之健如禁強暴之類所謂能止健
也不曰健而止而曰能止健者以乾之健受艮之止
卦之所以稱大畜也大正總承上以剛陽在上尊尚
賢德能止至健皆非大正不能以釋利貞之義也

不家食吉養賢也

亦取尚賢之象方陽剛在上六五所尊之時占者得之宜食祿于朝所以不家食也

利涉大川應乎天也

亦以卦體言涉險非乾健不能六五下應乎乾故能涉川天者時而已矣有蘊蓄之才又有乾健之力自可乘時濟險

象曰天在山中大畜君子以多識前言往行以畜其德

天在山中本義謂不必實有是事然天色地外地下
有天是即山中之天也山中有天所畜至大君子以
此多識前古之言已往之行以畜其德之大者小畜
言懿文德不過文章才藝之末而已此則就道德性
命言之

初九有厲利已

已止也乾之三陽為艮所止初九為六四所止若恃
其陽剛而銳于進往必有危故利于止也他卦取陰

陽相應為吉此取其能畜故外卦以畜止為義內卦以自止為義獨三與上畜極而通則不以止言也以自止為義者以陰陽言若君子之受畜于小人以畜止為義者以上下言若有位之禁止強暴

象曰有厲利已不犯災也

自止則不犯災

九二輿說輶

輶車傍橫木行則縛止則脫暫止旋起之義輻脫則

車破敗輶脫但不欲行而已故小畜之脫輻在人而大畜之脫輶在己盖九二亦為六五所畜以其剛中故能自止而不進乾有輿象互兌為毀折故有脫輶之象

象曰輿說輶中无尤也

以其剛而得中不至于過

九三良馬逐利艱貞日閑輿衛利有攸往

三以陽居健極上以陽居畜極畜極而通之時也乾

為良馬與上之陽合志三互震為作足之馬故有良馬逐之象然恐其過剛銳進故戒以利于艱貞而日閑習其與衛則利有攸往也輿者任重之物衛者應變之具乾有輿象陰爻兩列在前有衛象以人事言君子不終家食以一身任天下之重者輿也以一身應天下之變者衛也必多識前言往行之理畜剛健篤實之德以待時而動也

象曰利有攸往上合志也

陽志上進且畜已極故上不下畜三而合志上進也
六四童牛之牯元吉

童牛未角之稱牯施橫木于牛角以止觸者六四變
離牛象應初童牛象互震木施木牛角為牯之象六
四畜初防之于始禁惡于未形為力則易故有防牛
觸于未角之象其占為大善之吉也

象曰六四元吉有喜也

喜其不勞而无傷也

六五殯豕之牙吉

坎為豕坎陽得乾之中畫故二亦有豕象二之陽已長而止之不若初之易矣然五以柔中居尊是以得其機而可制如豕牙之猛利制其牙則力勞惟殯去其勢則剛蹠自止故亦吉但不如四之元吉耳又按來註天下无嚙人之豕引埤雅云牙者以杙繫豕也此與童牛之牯同例殯走豕也殯字與童字同牙字與牯字同互震木有牙象五變巽為繩有繫象此說

亦可存

象曰六五之吉有慶也

制惡有道則不至于決裂天下之福慶也

上九何天之衢亨

何字程傳謂衍文本義謂何其通達之甚也驚喜之詞今從本義艮為徑路天之衢則大通矣艮本畜乾乃畜極而通三陽上達在卦之上故有天衢之象始抑而今乃大通故若訝之喜之其亨可知矣

象曰何天之衢道大行也

賢路大開君子之道可大行矣全卦兼畜德畜賢畜健六爻則專取畜止受畜者當知自畜之道主畜者貴有豫畜之功至于畜極而通則又理數之自然不可強者也然畜之所以大恃艮上之一陽乃四五陰爻有畜止之事至上反不言畜者蓋唯所畜者大則所通者亦大故小畜之上九畜道之成反有征凶之戒而大畜之上九畜道已散反有大行之亨又喜陽

惡陰之微旨也



頤卦下震上艮上下兩陽中含四陰上止下動頤之象也口所以飲食故卦名頤而取義于養頤次大畜按序卦物畜然後可養故受之以頤物既畜聚必有所以養之頤所以次大畜也全彖言養人自養皆歸于正而極言養道之大六爻下震動多言求人之養求養者多不正故多凶上艮止多言養人養人者多

得正故多吉此全卦六爻之大旨也

頤貞吉觀頤自求口實

頤口旁也卦取頤之象而口之食物所以養也故取
養之義頤中有物曰噬嗑恐害其所養故不取養義
頤中虛未受外物則當擇其所養唯正則吉也觀頤
本義謂觀其所養之道就養德言自求口實本義謂
觀其所以養身之術就養身言觀其養德者果出于
聖賢而不入于他途養身者果合于理義而不害于

饑渴則得正而吉矣今時解皆從之然按正義及程傳皆以為觀其養人及自養今觀彖傳語意近之則所謂觀頤者觀其所以養人不可不得其道所謂自求口實者求其所以自養不可徒徇其欲也自養者小養人者大故彖傳極其義于天地聖人則養人之義不可無又自養有道則不以口腹累其心志雖言養身而養德之意已在其中不必以觀頤為養德也彖曰頤貞吉養正則吉也觀頤觀其所養也自求口實

觀其自養也

觀象傳所養自養作養人自養為是君子在上足以養人在下足以自養卦中上下二陽為卦之主爻所養指上九自養指初九也

天地養萬物聖人養賢以及萬民頤之時大矣哉

此極言養道之大皆得其正者也天地之于萬物无庸區別陰陽運行而萬物各遂其生一出于正而已若不正則二氣繆戾何以養萬物乎聖人之養人不

能家賜而人益之也必擇賢才與共天祿使之施澤于天下是養賢以及萬民亦一出于正而已若不正則賢人不在上位澤何由下究乎此極言養之大故專就所養言之也

象曰山下有雷頤君子以慎言語節飲食

帝出乎震萬物得養而生成言乎艮萬物得養而成所以取于養也言語飲食皆頤之動慎之節之法艮之止也慎言語所以養德節飲食所以養身此則專

就自養言之已得其養然後可以及人也象傳言養之大者故極其所養至于萬物天下象傳言養之切者故先其自養而始于言語飲食要皆出于正者也初九舍爾靈龜觀我朵頤凶

上宜養下然陽又宜養陰初陽在下不能養人故以自養言之靈龜不食之物朵動也朵頤食物之貌離體中虛為龜全卦有靈龜象我指四也上三爻主養人者初與四正應宜待養于四不宜凶者然陰則待

養陽宜養人初九陽剛在下不能養人猶當善于自
養乃以震體而上應六四之陰有舍靈龜觀于四而
朵其頤欲有所食之象靈龜以氣自養不求養于外
養之得正者也朵頤則貪欲而易其清撝養不以正
宜其凶矣

象曰觀我朵頤亦不足貴也

陽剛以能養人為可貴今乃不能自養至為欲所累
不足貴也

六二顛頤拂經于丘頤征凶

上之養下理之常經也然陰不能自養必欲從陽求
養今二求養于初則顛倒而違于常理矣上九最高
有丘象二求養于上則非正應往必取凶矣六二在
他卦為柔順中正在頤則為動于口體上動于上下
動于初皆自養之不以正者也

象曰六二征凶行失類也

拂經之義易明不必言矣于丘頤乃曰征凶者以上

非正應失其類也本義兼初爻言之似不必

六三拂頤貞凶十年勿用无攸利

三與上為正應待養于上得頤之貞者也然自處不
中不正居動之極是媚上以貪求而无厭者拂頤之
貞矣其占必凶互得坤有十年之象不中正而妄動
无所往而利者也盖全象以正而吉三不中正故凶
象曰十年勿用道大悖也

不中正而妄動大悖頤養之道也

六四顛頤吉虎視眈眈其欲逐逐无咎

上三爻皆以養人言之而陰宜待養于陽四與初又正應故程傳本義皆謂此爻求養于下以養人者時鮮從之作大臣用賢以養民之義然以虎視為四則爻中未見養人及施下之象于象傳上施之言不合今從蘇傳作以四養初為順蓋上宜養下陽宜養陰以上下之位言之二求養于初固顛頤以陰陽之義言之初求養于四亦顛頤也但四居初之上所處得

正又為正應自初而言之則初之見養于四為凶自四而言之則四之能養初九為吉初九之剛其視若虎之眈眈不可馴也六四順其所欲而致之遂遂焉而來不失以上養下之正咎可无矣綜卦本不宜取象但自四視初則震反為艮故初有虎視之象

象曰顛頤之吉上施光也

按蘇傳謂六四于初為上六四之所施可謂光矣今按施固在四不妨兼上爻言之蓋上爻物所由以養

六四與上同體四所以逐逐能繼者亦賴與上同體
得以恩施及下也以人事言五君也上相也四則奉
令行政之大臣膏澤下于民者也

六五拂經居貞吉不可涉大川

以上養下常經也六五以陰居尊不能養人反賴上
九以為之養拂于經矣然居尊而能順陽剛之德以
為養又艮體之中故有靜安于正而得吉之象陰柔
不可以大有為故又有不利涉大川之象六二拂

經而凶此拂經而猶吉者二動體貪求于人以自養則失正而凶五止體雖不能養人而能用人以養人則正矣故吉時解作君用賢養民近之

象曰居貞之吉順以從上也

能從上九之賢以養天下故也

上九由頤厲吉利涉大川

六五順上九以養人是物由上九以養也故曰由頤然位高任重易失之專故必危厲而吉五不利涉大

川而上利者五柔而上剛也此居大臣之位而澤及天下可以濟變者也

象曰由頤厲吉大有慶也

言天下被其澤也全卦言自養養人皆貴于得正六爻以上下之勢言之則在上宜養人在下則不能故上三爻多言養人而下三爻多言自養以陰陽之分言之則陽能為養而陰待養于陽故初上有養人之才而中四爻皆有藉于初上上九居上卦之上又有

陽剛之德六五藉之以養天下者故最吉初九其位雖不能養人其陽剛猶可以自養乃動于四而自養併失其正者也故凶四五雖不能養人而能資人之養又推以養人者也故雖未能如上之涉川而皆有吉道二三既待養于人又急于求賢則自養之大遠于正者也故其凶又有甚于初矣要之自養得正然後可以養人君子必由慎言語節飲食以為自養之功極之至如天地之養萬物聖人之養賢以及萬民

以盡所養之道庶有得于頤卦之旨矣



大過下巽上兌澤以潤木乃至滅木有大過之象陽
大陰小中四陽極盛初上二陰不能勝大者過也故
名大過大過次頤按序卦頤者養也不養則不可動
故受之以大過凡物養成而後所動者大非常之事
大過于人由于所養者大大過所以次頤也又六十
四卦次序多由相綜惟乾與坤錯坎與離錯此則澤

風與山雷相錯下經則以風澤與雷山相錯也全象
以四陽雖過而二五得中內順外說其道可行故所
往皆亨六爻則以剛柔相濟者為善而過剛過柔者
皆凶二四爻剛而位柔故二利而四吉初爻柔而位
剛故无咎三五重剛而三又不中者也故三凶而五
醜至上則以柔居柔過于柔者也故凶大抵剛柔相
濟則有大過人之才行大過人之事否則過于剛過
于柔皆失之于過者也此全卦六爻之大旨也

大過棟橈利有攸往亨

大陽也四陽居中過盛故為大過上下二陰不能勝
又卦之大象坎坎為棟又為矯揉故有棟橈之象然
二五得中內巽外說有可行之道故所往皆亨也既
有棟橈之象而又利于往而可亨者有陽剛之才則
雖當甚危之時无不可為之事此所以大過乎人也
彖曰大過大者過也

謂陽過也此以卦體釋卦名義也

棟橈本末弱也

本謂初末謂上弱謂陰柔也此又以卦體釋卦辭也
剛過而中巽而說行利有攸往乃亨

以卦體言之剛雖過而二五得中以卦德言之巽順
而和悅以行如此則不激于意氣不拂于物情調劑合宜
委曲盡善所往皆利乃可亨也乃者難之之辭

大過之時大矣哉

以大過人之材立非常之大事創不世之大功成絕

俗之大德唯其時為之无其時不可過有其時无其
才不能過也

象曰澤滅木大過君子以獨立不懼遯世无悶

澤以潤木而今滅沒之大過之象也君子之行不求
同俗而求同理天下非之而不顧獨立不懼也不求
人知而求天知舉世不知而不悔遯世无悶也此皆
大過人之行也

初六藉用白茅无咎

卦以棟橈為象初則本之弱者然但以棟橈為言則天下事付之不可為矣故又因爻取象巽為木有茅象初在下以柔承剛有藉用白茅之象初六以陰居陽雖弱猶愈于上又大過之初居事之始苟能過于謹慎猶可自全如木中剛本柔苟錯于地或致缺折藉以白茅庶幾无傷以其能畏懼故得无咎也

象曰藉用白茅柔在下也

下柔承剛當過于慎也

九二枯楊生梯老夫得其女妻无不利

梯根之榮于下者女妻年之少者九二陽之過有枯
楊象二三四互純乾有老夫象初陰在下有女妻象
既處于陰又與初比得陰之滋有梯根復秀女妻得
遂生育之象其占无不利也此剛資于柔以成務者
也

象曰老夫女妻過以相與也

二剛之過得初陰以相與以成天下之事也

九三棟橈凶

三四居卦之中三又變坎皆有棟象全卦弱在初上
乃于三言棟橈者蓋以剛居剛又與上應上以柔居
柔既不能勝三過剛必折是故橈者在三此大臣之
過于剛而不勝其任者也

象曰棟橈之凶不可以有輔也

剛強之過不能取于人人亦不能輔之

九四棟隆吉有他吝

九四在三之上以剛居柔上與初應以柔居剛剛柔相濟以成天下之務者也故其棟有隆起之象而占則吉也有他吝反言以決之謂當大過之時必剛柔相濟如四乃可不然而或失之剛或失之柔皆吝道也

象曰棟隆之吉不桡乎下也

四以剛居柔初亦以柔遇剛則其下不致桡折矣本義以應初為有他以不係于初為不桡然細觀全卦

以陽之過而有棟橈之象蓋凡物以過剛而過柔
必有橈折也三四皆棟象而三獨言橈以三之過于
剛也初上本末皆弱而上獨最凶以上之過于柔也
三以應上得凶則四以應初得吉可知矣故不必以
應初為嫌也

九五枯楊生華老婦得其士夫无咎无譽

九五亦陽之過有枯楊象陰爻在上又五變為震震
為虜有華生于枯楊之象五陽爻變為震又少于上

有士夫象比于上六有為老婦所得之象蓋陽爻為
夫陰爻為婦又以爻之上下分老少取象不可易也
陰雖過極得陽不為无益故亦无咎蓋陰欲陽非陽
之咎也然二之老夫女妻以剛為主而柔輔之五之
老婦士夫則以柔為主而剛反輔之矣何譽之有
象曰枯楊生華何可久也老婦士夫亦可醜也

枯楊生華旋即枯矣老婦雖得士夫安能成生育之
功乎

上六過涉滅頂凶无咎

兌為澤涉水之象一變為乾為坎又居最上有過涉于水滅沒其頂之象其凶甚矣而得无咎者四陽方過盛上以陰爻居陰位陰不敵陽自其分也如棟之桡必自其最弱之處桡析理勢固然无足怪者以人事言之則當大過之時才弱不能自濟然理窮勢極殺身成仁于義為无咎也

象曰過涉之凶不可咎也

事雖无濟理勢當然不可咎之也全卦以陽過乎陰
取棟橈之象大過不能无橈卦中二五陽皆在中故
猶可亨六爻皆欲其剛柔相濟以適乎中然後當大
過之時不至于有過大抵剛中有柔柔中有剛者吉
偏剛偏柔者凶陽剛在上為主而陰柔輔之者宜陰
柔在上為主而陽剛輔者否初上本末皆弱然上以
柔居柔又居最上故凶初以柔居剛又所處下故无
咎三四皆象于棟然四以剛居柔又居上而下取初

之輔故吉三以剛居剛又自下而附上之柔故凶五
以剛居剛又自下而上比于上故醜二以剛居柔在
上而取初之比故利人當大過之時必以剛為主以
柔為輔非剛无以任天下之重非柔无以成天下之
功身在下位則當柔而能剛敬以承上庶幾白茅
之義身在上位則當剛而能柔求賢自輔得棟隆之
吉老夫之利矣若以剛居剛反上附于陰不凶必醜
若柔弱已極而居最上唯有取凶而已



坎卦一陽陷于二陰之中陽實陰虛上下无據為坎
陷之義故卦名坎坎次大過按序卦物不可以終過
故受之以坎坎者陷也理无過而不已過極必陷坎
所以次大過也坎為險陷全象取一陽在中以為內
實有常剛中可以有功時世有險而此心无險故雖
險而亨此全卦之大旨也六爻皆不言吉二五雖剛
中而皆在險中五得位而二不得位故五既平而二

僅小得也四陰爻亦皆從陽爻起義三四在陽爻之中猶愈于初上在陽爻之外三以失位乘陽而無功四以得位承陽猶得无咎若初上則在兩陽爻之外初居險之下而上居險之極故凶為最甚此六爻之大略也

習坎有孚維心亨行有尚

習重習也坎險陷也水象陽陷陰中外虛內實險陷之象此卦上下皆坎是為重險故言習乾坤六爻同

一爻可不言習坎卦序在六子之先此言習而他皆以重習起義可知矣坎卦中實而水內明有有孚心亨之象世可險而心不可險身可陷而心不可陷誠信在中則安于義命而不僥倖苟免此心有主不為利害所動而心亨矣心亨則洞察時勢取必于理而行自必有功此所以為處坎之道也

彖曰習坎重險也

危難洊至險而又險也此釋卦之名義

水流而不盈行險而不失其信

水流足此通彼无有盈溢雖奔突險阻專赴于壑而不失不盈之信盖水性趨下不盈即趨下也此以卦象釋有孚之義也

維心亨乃以剛中也行有尚往有功也

三五以剛在中實心无累何往不通如是而行必有功也盖坎以能行為功若止而不行則常在險中矣天險不可升也地險山川丘陵也王公設險以守其國

險之時用大矣哉

不可升无形之險山川丘陵有形之險王公因有形之險為无形之險是謂人險坎卦四陰二陽二陽中實之象體水之德為有孚心亨處險之道也四陰險陷之象因坎之形而設險守國用險之方也往有功以上皆言處險之道此則言用險之方

象曰水流至習坎君子以常德行習教事

水流不已以成大川人學不已以成大賢君子于已

之德行務于常久于教人之事務于熟習

初六習坎入于坎窞凶

坎中小穴旁入者曰窞以陰柔居重險之下其陷益深故其象占如此

象曰習坎入坎失道凶也

深入于險失出險之道也有孚心亨所謂道也

九二坎有險求小得

處重險之中未能自出故為有險之象然剛而得中

故有求而小得之象

象曰求小得未出中也

雖有剛中之才未能出坎中之險

六三來之坎坎險且枕入于坎窞勿用

陰柔不中正而履重險之間來往皆險前險而後又
枕于險之象其陷益深不可用也初入于坎窞則曰
凶此曰勿用初不可出此猶可出也

象曰來之坎坎終无功也

未有出險之道

六四樽酒簋贰用缶納約自牖終无咎

貳副貳之意益之也牖室之所由以明者坎有酒食之象四變互巽木樽簋之象互離中虛有瓦缶及牖象按本義以樽盛酒以簋盛食復以瓦缶為副樽按來註一樽之酒二簋之食樂用瓦缶覺來註為順且與象傳合絕言當險難之時不事多儀而尚誠實也自牖言不由正道因其所明者而進結之蓋當艱險

之時不能直致自間道以上達也六四居大臣之位處險之中本其至誠因君之所明者委曲獻納則雖歷艱險而終得无咎也

象曰樽酒簋飯剛柔際也

本義謂无貳字人情同樂則相猜共患則相倚四與五比君臣相接在險難之中不事煩文以誠相向可
以上達將出于險矣

九五坎不盈祗既平无咎

九五在坎之中陰之下有不盈之象祇至也以陽剛中正居尊位上止一陰勢將出險有既平之象不盈猶有險也既平則无險矣二居重險之中故有險五出重險之外故既平將出于險可无咎矣

象曰坎不盈中未大也

剛中居尊宜濟天下之險乃猶在坎中有中德而未光大也大有六五以柔居中乃曰大中此以剛居中反曰未大者大有柔能統剛坎則剛猶陷于柔也

上六係用徽纆寘于叢棘三歲不得凶

三股曰徽兩股曰纆皆索名叢棘獄牆所設坎為刑
獄上變巽為繩上六以陰柔居險極故有此象周禮
司圜收教罷民能改者三年而舍其不能改而出圜
土者殺三歲不得罪大不能改者也占者得之則不
能出險可知

象曰上六失道凶三歲也

三歲久之極所以至此者失處險之道也全卦二五

中實故有有孚心亨之象然處險之道即在是矣故
六爻惟二五得有孚心亨之道二在險下但可小得
五在險上則既平也初以最下而凶上以險極而甚
三以處前後險之間而勿用惟四際五僅得无咎然
樽酒納約亦得有孚心亨之義故也



離卦一陰麗于上下之陽有附麗之義中虛有光明
之義離麗也明也于象為火體虛麗物而明者也又

為日亦麗天而明者也故卦名離離卦次坎按序卦
坎者陷也陷必有所麗故受之以離離者麗也陷于
險難之中必有所附麗理之自然離所以次坎也又
按上經終于坎離下經終于既濟未濟六十四卦以
乾坤為首而坎離居其中蓋坎離二卦天地之心也
造化之本也天一生水而二生火坎藏天之陽中受
明為月離麗地之陰中含明為日坎為水而司寒離
為火而司暑坎為月而司夜離為日而司晝故先天

之圖乾南坤北後天則離南而坎北坎離為乾坤之繼
體此上經終坎離下經終既濟未濟之意而道家亦
以人身為小天地以心腎分屬坎離而其功用取于
水火之既濟蓋亦從易說而旁通之者也全卦以柔
順得正為吉六爻以二陰爻為主二中正而五非正
故不如二其四陽爻則從陰爻起義初上在陰爻之
外勝于三四在陰爻之中三日昃而四焚如以在二
五兩陰之內也初能敬而上出征以在二五兩陰之

外也蓋坎離二卦奇耦反對故爻象之吉凶亦相反也

離利貞亨畜牝牛吉

離之為麗猶亂之為治以陰麗于陽也物之所麗貴乎得正故正則有可亨之道也又離得坤之中畫牝牛皆取陰象坤以全體配乾而行故為牝馬之行離以二五附乾而居故當為牝牛之畜蓋所麗得正則亨又當柔順自處則吉也坎離二卦爻畫反對故其

義其占皆相反蓋坎之明在內當以剛健行之于外
離之明在外當以柔順養之于中坎水潤下愈下則
陷故以行為尚離火炎上愈上則焚故以畜為吉也
彖曰離麗也日月麗乎天百穀草木麗乎土重明以麗
乎正乃化成天下

日月麗天以氣麗氣而成明百穀草木麗土以形麗
形而成文君臣上下皆有明德而處于中正則可以
成天下文明之化此皆以釋卦之名義也

柔麗乎中正故亨是以畜牝牛吉也

二中正五中而不正中正統言之此以卦體釋卦辭也

象曰明兩作離大人以繼明照于四方

明兩作兩明相繼而起也繼明猶以聖繼聖也前言重明以上下言之取象于君臣此言兩作以先後言之取象于帝王之父子若以人事言之則日新又新緝熙不已繼明之義也洞達事理光被四表照于四

方之義也

初九履錯然敬之无咎

剛明在下其性炎上剛則踈明則察二者襟于胸中
所履交錯之象能敬則心有主不至于錯可以无咎
矣火在下而未上炎猶有可制雖戒占者之辭亦其
象然也

象曰履錯之敬以辟咎也

剛明而不妄動咎可辟矣

六二黃離元吉

黃中色坤為黃離中爻乃坤土有黃象柔麗乎中而得其正以此事君將順而能匡救以此治民渾厚而能精明上可正君下可成化純臣之道大善而吉之占也

象曰黃離元吉得中道也

言中而正在其中矣

九三日昃之離不鼓缶而歌則大耋之嗟凶

重離之間前明將盡有日昃之象離中虛缶象互五為兌口歌與嗟之象死生猶晝夜之常理鼓缶而歌安常以自樂可也不然而徒以大耄為嗟則窮蹙以死而已故凶蓋數之所至當安于命也

象曰日昃之離何可久也

求人以繼其事退處以休其身可也

九四突如其來如焚如死如棄如

前明盡而後明忽迫有突如其來如之象其炎正盛

焚如之象履非其位逼近至尊勢不能終死如之象
无應无承衆无所容棄如之象

象曰突如其來如无所容也

无所容總釋上文舉突如其來句可該

六五出涕沱若戚嗟若吉

以柔履剛不得其正而迫于上下之陽互卦兌澤之
流兌口之開故有出涕沱若戚嗟若之象然居尊位
而知憂懼故占得吉也

象曰六五之吉離王公也

居王公之位而知憂懼故吉也三前明將盡則不宜為大耋之嗟五柔中居尊則宜以戚嗟自戒


上九王用出征有嘉折首獲匪其醜无咎

離為甲冑戈兵故有出征之象上九為五所麗有王用之之象有嘉言有嘉美之功折首但誅其首惡也獲匪其醜言不及其徒衆也陽剛在上有出征有嘉之象離為上稿折首之象剛明在上所照及遠有折

首不及其醜之象如此則威震而刑不濫何咎之有
象曰王用出征以正邦也

寇賊亂邦上能以剛明除天下之惡所以正邦也全
卦以居中得正有可亨之道而以柔順自處自能獲
吉六爻惟二兼中正柔順之德故為最吉五中而不
正而居尊位以照臨四方故雖憂懼而亦有吉道又
火性炎上在下則有勢易制在上則其明及遠所以
皆无咎若三處前明之盡四居後明之逼則凶不待

言矣



周易淺述卷三